



SEBAHAGIAN penggerak dan peserta Seminar Keusahawanan Perdagangan yang diadakan di UMK Kampus Kota, Kota Bharu, Kelantan, baru-baru ini.

UMK dedahkan pelajar sekolah mengenai keusahawanan

KOTA BHARU 12 Jun – Universiti Malaysia Kelantan (UMK) berjaya menganjurkan Seminar Keusahawanan Perdagangan melalui Projek Profesor Bersama Sekolah di Dewan Keusahawanan, UMK Kampus Kota, dekat sini, baru-baru ini.

Timbalan Naib Canselor (Penyelidikan & Inovasi), Prof. Datuk Dr. Ibrahim Che Omar berkata, seminar itu mencakupi usaha meningkatkan kemahiran berfikir serta percambahan idea yang dalam kalangan pelajar.

Beliau berkata, program itu amat berkesan dan telah berjaya menarik minat pelajar yang hadir untuk mendekati dengan lebih mendalam mengenai aktiviti-aktiviti berkaitan

pendidikan Sains, Teknologi, kejuruteraan dan Matematik (STEM).

“Pelajar sekolah telah dipupuk minat untuk membina prototaip robotik menggunakan perisian arduino, prototaip lain yang boleh dikaitkan dengan pendidikan STEM, membangun ‘e-commerce website’ dan membina aplikasi mobile (apps),” katanya pada majlis perasmian seminar berkenaan, di sini, baru-baru ini.

Sementara itu, Penyelaras program berkenaan Prof. Dr. Raja Suzana Raja Kasim berkata, seminar itu membawa satu pendekatan baharu kepada siswa UMK kepada pasaran sebenar secara kreatif dan inovasi.

Menurutnya, sebanyak 43 idea perniagaan berkaitan dengan ilmu

keusahawanan-pendidikan STEM telah dipamerkan pada seminar berkenaan dihadiri pelajar sekolah, guru-guru, pelajar, kemahiran teknologi vokasional dan usahawan luar.

“Pendekatan ini membawa model baharu dalam arus pendidikan keusahawanan iaitu daripada perniagaan tradisional seperti menjual nasi lemak atau jual air kepada perniagaan berasaskan Pendidikan yang lebih berteknologi dan berwawasan,” katanya.

Seminar tersebut dirasmikan oleh Pengurus Muda, Dewan Perniagaan Melayu Malaysia Negeri Kelantan, Wan Abdullah Hassan Wan Azmi.